

هي : مش بتقول جهنم ؟ ..  
هو : وهيه جهنم معناها الجواز عندك ؟  
هي : أنت دائما بتقول كده ..

هو : أنا بأقول أن الجنة مفيش فيها جواز .. آدم ما تجوزش  
حواء إلا لما نزل الأرض .. و جهنم كمان مفيش فيها جواز ..  
هي : لا أنت ما بتقولش كده .. أنت بتقول أن جهنم مش  
ممکن يكون فيها جواز .. لأن الجواز هو جهنم .. والجواز  
في جهنم معناه : جهنم في داخل جهنم .. وربنا ما يرضاش  
بالظلم ده ..

هو : أنا أمتي قلت الكلام ده ؟

هي : زمان ..

هو : وأفرضي أنني أنا قلت ده زمان وبعدين غيرت رأيي ..  
مش الواحد بيغير رأيه حسب الظروف ..

هي : لا أنت حتقول لي .. أنت كل يوم لك رأي .. يوم  
أقول لك بتحبنى تقول : أيوه .. يوم تقول : يارتنى ماحبيتك ..  
ويوم تقول لي : أن الحب والكراهية الأثنين زي بعض .. وزى  
ما فيه ناس يتموت نفسها بسبب الحب ، فيه ناس يتموت  
غيرها بسبب الحب .. والنتيجة واحدة .. ومرة تقول لي :